

# Piniarneq aallaaniarnerlu pillugit Inatsisartut inatsisaat

## *Inatsisip atuuffii.*

§ 1. Inatsit, nunami imaanilu aalisarnikkut Kalaallit Nunaata oqartussaaffigisaani, piniarnermut aallaaniarnermullu atuuppoq.

## *Inatsisip siunertaa.*

§ 2. Inatsisip siunertaraa piniagassanit isumalluutit pissusissamisoortumik uumassusillillu eqqarsaatigalugit illersorneqarsinnaasumik iluaqutigineqarnissaasa qulakkeerneqarnissaat.

*Imm. 2.* Inatsisip atortinneqarnerani isumalluutit piujuarnissaat kinguaassiortuarnissaallu, ileqquusumik uumassusilinnik misissuisut siunnersuinerat naapertorlugu eqqarsaatigilluagaasumik ukiullu qanoq ilinera eqqarsaatigalugu pissarsiffiunerpaasumik iluaquteqarniarnissaq, piniarnermik inuussutissarsiteqarnermi inuussutissarsiutinilu tamatumunnga attuumassuteqartuni aningaasaqarniarnikkut suliffissaqartitsiniarnikkullu isiginiagassat, inuussutissarsiornermi soqutigisat allat kiisalu innuttaasut sunngiffimmini sammisassaqaarnissamut pisariaqartitaat pingaartinneqassapput.

*Imm. 3.* Piniarnermut aallaaniarnermullu tunngasutigut aqutsinermut atatillugu ilaatigut kattuffiit attuumassuteqartut kiisalu Piniarneq pillugu Siunnersuisoqatigiit aqutigalugit pinia-tut atuisullu ilisimasaasa ilanngunneqarnissaat pingaartinneqassapput.

*Imm. 4.* Naalackersuisut piniarneq aallaaniarnerlu pillugit aqutsinerni piniaartut atuisullu ilisimasaasa ilanngunneqarnissaat pillugu erseqqinnerusunik malittarisassiorsinnaapput, imm. 3 takuuk.

## *Nassuiaatit.*

§ 3. Inatsimmi uani "inuiaqatigiinnut kalaallinut aalajangersimasumik attuumassuteqartut" tassaatinneqassapput inuit inoqutigiinnut ilanngunermikkut, inissaminik attartornermikkut pisinermikkulluunniit, imaluunniit allatut iliornermikkut Kalaallit Nunaanni angerlarsimaffeqalersaarnerminnik ersersitsisut.

*Imm. 2.* Inatsimmi uani "akuersissut" tassaatinneqassaaq uumasumik aalajangersimasumik piniarniarsinnaatitaaneq naalackersuisunit inummut angallammulluunniit akuersissutigineqartoq.

*Imm. 3.* Inatsimmi matumani "angallatit imakkoorutit/nunakkoorutit" tassaatinneqassapput immakkut nunakkullu assartuutit suqaluartulluunniit piniarnermut, aallaaniarnermut aamma aalisarnermut atorneqartut imaluunniit piniarfimmut piniarfimmiillu assartuutit atorneqartut.

*Piniarsinnaanissamut aallaaniarsinnaanissamullu piumasaqaatit.*

**§ 4.** Piniarneq aallaaniarnerlu inunnit taamaaliornissamut akuersissutaateqartunit taamaallaat ingerlanneqarsinnaavoq. Akuersissut inuussutissarsiutigalugu imaluunniit sunngiffimmi aallaaniarsinnaanermut allagartatut tunniunneqartarpoq, taamaattorli § 7 takuuk.

*Imm. 2.* Inuussutissarsiutigalugu piniarnermut aallaaniarnermullu akuersissut taamaallaat tunniunneqarsinnaavoq inunnut

- 1) inuiaqatigiinnut kalaallinut aalajangersimasumik attuumassuteqartunut;
- 2) Kalaallit Nunaanni najugalittut inuit nalunaarsorsimaffiannut nalunaarneqarsimasunut, Kalaallit Nunaannilu najugalittut ukiuni qaangiuttuni marlunni nalunaarsorneqareersimasunut; aamma
- 3) Kalaallit Nunaannut tamakkiisumik akileraartartussaataasunut, Kalaallit Nunaannullu ukiuni qaangiuttuni marlunni tamakkiisumik akileraartartuusimasunut.
- 4) piniarnermit, aallaaniarnermit aalisarnermillu isertitaqartunut isertitat tamarmiusut ikinnerpaamik 50%-iisa nalinginik. Angallatit angallatip uuttuutaanut uppernarsaat naapertorlugu 150 BRT-iniit imaluunniit 210 BT-iniit anginerusut atorlugit aalisarnermit isertitat tamarmiusut piniarnermit, aallaaniarnermit aalisarnermillu isertitat tamarmiusut naatsorsuusionerqarnerannut ilanngunneqassanngillat. Qinikkatut pisortanillu toqqakkatut suliassaqartitaanermit aningaasarsiat imaluunniit inuussutissarsiutigalugu piniartut kattuffisa/peqatigiiffisa siulersuisuini sulinermit aningaasarsiat, piniarnermit, aallaani-arnermit aalisarnermillu isertitat tamarmiusut naatsorsorneqarnerannut imaluunniit isertitat ilanngaasigaanngitsut tamarmiusut naatsorsorneqarnerannut ilanngunneqassanngillat.

*Imm. 3.* Sunngiffimmi piniarnissamut aamma sunngiffimmi aallaaniarnissamut akuersissut tunniunneqarsinnaavoq danskisut innuttaassusilinnut aamma nunani allani innuttaassusillit Kalaallit Nunaanni inuit nalunaarsorsimaffiannut nalunaarneqarsimasut.

*Imm. 4.* Naalackersuisut imm. 2, nr. 2 - 4-mi aamma imm. 3-imi aalajangersakkat immikkut akuersissuteqarfigisinnaavaat, qinnuteqartup Kalaallit Nunaannut attuumassuteqarnera aallaavi-galugu tamanna naapertuuttutut isigineqarpat, qinnuteqartorlu ilinniarnermik assigisaanilluunniit pissuteqartumik Kalaallit Nunaata avataaniikkallarsimappat.

**§ 5.** Sunngiffimmi piniarnermut aallaaniarnermullu akuersissutit piniakkanut killilersukkanut inunnut Kalaallit Nunaanni najugalittut inuit nalunaarsorsimaffiannut nalunaarneqarsimasunut qinnuteqarnikkut tunniunneqarsinnaapput, qinnuteqarfissaq sioqqullugu Kalaallit Nunaanni najugalittut ukiuni qaangiuttuni marlunni nalunaarsorneqareersimasunut.

**§ 6.** Piniarnermut allagartat tunniunneqarnissaannut, pissarsiarinissaannut pigiunnaarsitaanissaannullu Naalackersuisut maleruagassaliussapput. Tamatumunnga atatillugu piniarnermut allagartat tunniunneqarnerinut Naalackersuisut akiliuteqartitsisinnaapput.

*Imm. 2.* Naalackersuisut imm. 1 malillugu malittarisassiornermut atatillugu kommunit peqqusinnaavaat tamatumunnga atatillugu allaffissornikkut ingerlatsinerup pisariaqartup ingerlannissaanut.

*Akiliisitsilluni piniartitsisarneq.*

**§ 7.** Inuit §§ 4-5-imi pineqanngitsut piniarnernut aallaaniarnernullu suugaluartunulluunniit immikkut akuersissummik pigisaqassapput.

*Imm. 2.* Inuit § 4-5-imi pineqartut kisiannili § 8, imm. 1, nr. 4 - 6 naapertorlugit malittarisassiat malillugit piniagassanik aallaaniarsinnaatitaanngitsut, inuit imm. 1-imi pineqartut assigalugit aallaaniarsinnaatitaaneramik pisinnaatitaalersinnaapput.

*Imm. 3.* Imm. 1 aamma 2 malillugit Naalakkersuisut akuersissuteqartoqarneranut akiliutissanik aalajangersaassapput akiliisitsiniassallutillu. Akiliutissaq naatsorsorneqassaaq akuersissutit tunniunneqarneranni allaffissornermut aningaasartuutit tunngavigalugit kiisalu akiliisitsilluni aallaaniartitsisarnermut atatillugu inatsisip siunertaata isumagineqarneranut aningaasartuutit tunngavigalugit.

*Imm. 4.* Naalakkersuisut imm. 1 aamma 2 malillugit piniarsinnaanermut aallaaniarsinnaanermullu akuersissutitinnit tunniussisarneq, pissarsisarneq pigiunnaarsitsinerlu pillugit kiisalu imm. 3 malillugu akiliuteqartitsinikkut pissarsiat atornerqarnerat pillugu erseqqinnerusunik malittarisassiorsinnaapput.

*Imm. 5.* Naalakkersuisut imm. 4 malillugu malittarisassiornermut atatillugu kommunit peqqu-sinnaavaat tamatumunnga atatillugu allaffissorinikkut ingerlatsinerup pisariaqartup ingerlannissaanut, taamatullu Naalakkersuisut suliffeqarfiit takornariartitsisartullu peqatigiiffii ingerlatsinermik suliaqartussanngortillugit piginnaatissinnaallugit.

*Eqqissimatitsineq, piujuaannartitsiniarluni teknikikkut iliuutsit, iluaquteqarniarneq il.il.*

**§ 8.** Naalakkersuisut piniarnerup aallaaniarnerullu malittarisassatigut aqunneqarnerat pillugu iliuuseqarsinnaapput, taamatuttaaq makku pillugit malittarisassiorsinnaallutik:

- 1) Piffissat eqqissimatitsiviusut sumiiffiillu piniarfigineqannginnissaat aallaaniarfigine-qannginnissaallu.
- 2) Pisanik piniarnermillu inerteqqutit imaluunniit killilersuinerit.
- 3) Pisineqarsinnaatitaasunik piffissanut sumiiffinnullu agguaassineq.
- 4) Pisineqarsinnaatitaasunik §§ 4 - 5 aamma § 7 malillugit ukioqatigiiaanut, kommuninut, angallatinut aalajangersimasunut, angallatinut ataasiakkaanut imaluunniit atortunut piniariaatsinullu erseqqinnerusunik pisassiissutinut aalajangersaalluni agguaassineq.
- 5) Piniakkanik aalajangersimasunik ataatsinik arlalinnulluunniit piniartoqassappat aallaaniartoqassappalluunniit piumasaqaatigineqarsinnaavoq inuk pineqartoq inuilluunniit pineqartut taamaaliornissamut akuersisummik pigisaqarnissaat.
- 6) Inuit §§ 4 - 5 aamma § 7 malillugit piumasaqaatinik naammassinnissimasut piniagassanik ataasiakkaanik piniarsinnaanerinut atugassarititaasunik erseqqinnerusunik aalajangersaaneq.
- 7) Piniutit, piniarnermi atortut taakkulu pisataasa ilusilersorneri atornerqartarnerilu, tamatu-munnga ilanngullugu angallatit immakkoortit/nunakkoortit, piniutit, aallaasit imassaat piniariaatsilluunniit aalajangersimasut atornerqartarnerinut inerteqqutit.
- 8) Piniarnermi aallaaniarnermilu ileqqorissaarnissamut malittarisassat.
- 9) Pisat suliaqqaarneqartarnerat, iluaqutigineqarnerat tuniniarneqartarnerallu.
- 10) Piniakkat angissusissaat, qassinik ukioqarnissaat suaassusiallu.
- 11) Uumasut nujuartat nikeriarsinnaajunnaartitaasarnarat, tiguneqartarnerat nuunneqartarnerallu kiisalu uumasut piniarneqartarnissaat siunertaralugu nuunneqarsimasut iluaqutiginiarnerisa aqunneqarnerat.

*Imm. 2.* Naalakkersuisut imm. 1 malillugu malittarisassiornermi kommunit peqqusinnaavaat tamatumunnga atatillugu pisariaqartinneqartumik allaffissorinikkut ingerlatsineq isumageqqullugu.

*Imm. 3.* Taamaattoq Naalakkersuisut piginnaatitsinerisigut aalajangersakkat imm. 1-imi taaneqartut kommunimut ataatsimut qassiinulluunniit atuutilersinneqarsinnaapput Naalakkersuisut akuerisaannik kommunalbestyrelsip pineqartup kommunimut ileqqoreqqusaliornaratigut.

**§ 9.** Piniarnermi aallaaniarnermilu aallaasinik eqiinnartakkanik eqittaannartakkanillu atuineq inerteqqutaavoq.

*Imm. 2.* Naalackersuisulli malittarisassiorsinnaapput, piniagassat, sumiiffit piffissallu ilaat eqqarsaatigalugit § 4, imm. 2 malillugu inuusutissarsiuqalugu piniarnermut aallaaniarnermullu aallaasit eqittaannartakkat atorreqarsinnaaneritut akuersissuteqarfusinnaasunik.

**§ 10.** §§ 4-5 aamma § 7 naapertorlugit aallaaniarnermut piniarnermullu akuersissummik pissarsinissamut atatillugu aallaaniarnermut misilitsittoqarnissaanik naalackersuisut malittari-sassiorsinnaapput.

*Imm. 2.* Naalackersuisut imm. 1 malillugu malittarisassiornermut atatillugu kommunit peqqusinnaavaat tamatumunnga atatillugu allaffissornikkut ingerlatsinerup pisariaqartup ingerlannissaanut.

*Pisanik pinngortitamilu uumassusilinnik nujuartanik misissuinerit.*

**§ 11.** § 8-imi imm. 1 aamma imm. 3 malillugit aalajangersakkat apeqquataatinnagit Naalackersuisut piniarnissamut aallaaniarnissamullu akuersissuteqarsinnaapput, nunami piniagassatigut isumalluutit paasinarneqarnerannut ilisimatuussutsikkulluunniit misissuinerit atatillugu.

*Kisitsisitigut paasissutissat.*

**§ 12.** §§ 4-5 malillugit piniarsinnaanermut allagartanik kiisalu § 7 malillugu akuersissutinik pigisaqartut uumassusilinnik naliiiniarnermut malittarisassaqaqtitsinikkullu ingerlatsinermit atugassanik pisat pillugit paasissutissiisarnissaannik Naalackersuisut malittarisassiorsinnaapput.

*Nakkutilliineq.*

**§ 13.** Inatsit manna malillugu aalajangersakkat aammalu malittarisassat inatsit taanna tunnga-vigalugu pilersinneqartut malinneqarnerannik nakkutilliineq pillugu Naalackersuisut malittarisassiorsinnaapput.

*Imm. 2.* Pisat, inatsit malillugu malittarisassianut akerliusumik pisarineqarsimasut, allanut tunniunneqartarnerat, pisarineqartarnerat tunineqartarnerallu pinngitsoortinniarlugit Naalackersuisut malittarisassiorsinnaapput, taamatutaaq makku pillugit:

- 1) Allat pisaannik pissarsisimaneq pillugu paasissutissiisarnissamut pisussaaffeqarneq.
- 2) Inuit allallu piniarnissamut aallaaniarnissamullu piginnaatitaaffeqanngitsut pisarisimasaannik taakkualuunniit ilaannik pissarsinissamut inerteqqutinik.
- 3) Uumasunik pisassalersuiffiusunik pisanik taakkualuunniit ilaannik, pisassat tamakkerneqareernerisigut, uumasunik taakkuninnga pissarsinissamut inerteqqutinik.

*Imm. 3.* Naalackersuisut maleruaqqusanik aalajangersaasinnaapput, pisat suliarineqanngitsut, eqqissimatitsinerup avataani pisarineqarsimasut tuniniarneqarsinnaasut ulluni aalajangersimasuni, eqqissimatitsiffiusup atuutilereernerani. Ilanngullugu Naalackersuisut ersarinnerusumik piniakkat ataasiakkat pillugit nalunaarutini ataasiakkaani nassuiaassisinnaapput, pisat suliarineqanngitsut qanoq paasisariaqarnerit.

**§ 14.** Sakkutuut aalisarnermik nakkutilliisut (fiskerinspektioni) politiillu piniarnermut aallaaniarnermullu angallatit kiisalu angallatit piniarnermut aallaaniarnermullu assartuissutigineqartut unitsissinnaavaat ikiffigalugillu sulinerminnut atatillugu misissuiffiginiarlugit, tassunga ilanngullugit angallatip pappialaataanik assigisaannillu misissuiffiginiarlugit kiisalu piniarnermut aallaaniarnermullu atortut misissorniarlugit, piumasarinnaallugulu piniarnermut aallaaniarnermullu atortut qaqinneqarnissaat sulinerminnut atatillugu misissugassatut. Taamatutaaq angallatit taamaattut Kalaallit Nunaanni umiarsualivimmut toqqarneqartumut ingerlaqqullugit naalakkerneqarsinnaapput pisaasa atortuisalu misissuiffigineqarnissaat niooqqarneqarnissaalluunniit siunertaralugu.

*Imm. 2.* Sakkutuut aalisarnermik nakkutilliisut politiillu piginnaatitaaffi eqqartuussiviit akuersiseqqaarnagit ingerlanneqarsinnaapput.

**§ 15.** Piniarnermik aalisarnermillu nakkutilliisut (jagt- og fiskeribetjentit) inuillu allat naalackersuisunit taamaaliornissamut piginnaatitaasut toqqarneqartullu angallatinut piniarnermut aallaaniarnermullu kiisalu angallatinut piniarnermut aallaaniarnermullu angallassissutitut atorineqartunut ikisinnaatitaapput tassungalu atatillugu pisarineqarsimasunik aamma piniarnermut aallaaniarnermullu atortunik misissuisinnaatitaallutik.

*Imm. 2.* Piniarnermik aalisarnermillu nakkutilliisut inuillu allat naalackersuisunit taamaaliornissamut piginnaatitaasut toqqarneqartullu piunasaqarsinnaapput inuk piniarsinnaatitaanersoq atuuttumik kinaassutsimut uppersaammik takutitseqqullugu.

*Imm. 3.* Piginnaatitaaffiit imm. 1 aamma 2-mi taaneqartut siumut eqqartuussiviit akuersiseqqaarnagit ingerlanneqarsinnaapput pissusissamisoortumik kinaassutsimut uppersaammik takutitsinikkut.

*Imm. 4.* Naalackersuisut imm. 1 aamma 2 malillugit piniarnermik aalisarnermillu nakkutilliisut imaluunniit inuit immikkut piginnaaffilerneqartut pisinnaatitaaffinut suliassaannullu erseqqinnerusunik maleruagassanik aalajangersaasinnaapput. Inatsimmi aalajangersakkat inatsillu malillugu maleruagassaliarineqartut malinneqarnerannut suliassat nakkutilliinermik ilaqassappata suliassat aalajangersarneqassapput naalagaaffimmi oqartussaasut oqaloqatigeqqaarlugit.

#### *Piniarneq pillugu Siunnersuisoqatigiit.*

**§ 16.** Piniarneq pillugu Siunnersuisoqatigiit Naalackersuisunit pilersinneqassapput pisortaarfimmit akisussaasumit kiisalu piniarnermut tunngasunik soqutigisalinnaq ilaasortaaffigineqartut.

*Imm. 2.* Naalackersuisut pisussaapput Piniarneq pillugu Siunnersuisoqatigiit suliani §§ 2, imm. 3-4, §§ 4, 5, aamma §§ 7-10-mut tunngasuni tusarniaavigissallugit.

#### *Pineqaatissiissutit.*

**§ 17.** Akiliisitsinermik kinguneqarsinnaapput:

1) Inatsimmi § 4, imm. 1, § 7, imm. 1 aamma § 9, imm. 1-imut aamma §§-it 4-imiit 5-imut aamma 7-imiit 8-mut aamma §§ 10-11 malillugit maleruqqusalianik unioqutitsinerit,

2) § 14 aamma § 15, imm. 1 malillugit peqqussuteqarnerit malinneqanngippata,

3) inatsit imaluunniit inatsit malillugu malittarisassiarineqarsimasut naapertorlugit akuersis-suteqarnermut piunasaqaataasut ilaginnarneqarpata, aamma

4) pisortanut oqartussaasunut eqqunngitsunik paasinerluutaasinnaasunilluunniit paasissutis-siisoqarpat, inatsimmi inatsilluunniit malillugu malittarisassiarineqarsimasut naapertorlugit peqqussutigineqartunik.

*Imm. 2.* Inatsit malillugu maleruqqusaliani aalajangersarneqarsinnaavoq maleruqqusaliani aalajangersakkanik unioqutitsineq akiliisitsinermik kinguneqarsinnaasoq.

**§ 18.** Pinerluttulerinermik inatsimmi arsaarinnittarneq pillugu malittarisassat atuupputtaaq.

**§ 19.** Pissutissaqarluarpat naatsorsuutigissallugu angallat inatsimmik imaluunniit inatsit malillugu malittarisassiarineqartunik unioqutitsinermut akiliisitsinermik kinguneqarsinnaasu-mut

atorneqarsimasoq, sakkutuunit aalisarnermik nakkutilliisunit politiinilluunniit tigusarineqarsinnaavoq.

**§ 20.** Angallat § 19 malillugu tigusarineqartoq eqqartuussisoqareerneratigut akiliisitsissutissamilluunniit aalajangiisoqareernikkut atortui tamaasa ilanngullugit tigummigallagassanngortinne-qarsinnaavoq, aningaasat akiligassanngortinneqartut arsaarinnissutigineqartussatullu aalajangikkat nalingi aammalu

suliamut aningaasartuutit akilerneqareerlugit, akiliinissamulluunniit qularnaveeqqusiisoqareerlugu. Suliap inaarutaasumik aalajangiivigineqarneraniit qaammatit marluk qaangiutsinnagit tamanna pinggippat angallat atortullu naammassinnissutiginiarneqarsinnaapput.

*Imm. 2.* Imm. 1-imi malittarisassaq atorineqassanngilaq angallammik atuisimasoq pisussaataitanani atuisimappat. Taamatutaaq imm. 1-imi malittarisassaq atorineqassanngilaq, angallatit piniutillu Kalaallit Nunaanni eqqartuussisarneq pillugu inatsisimmi tamanna pillugu aalajangersakkat malillugit qularnaveeqqusiunneqarsinnaanngippata.

*Imm. 3.* Tigummigallagassanngortitsineq akertilernerqarpat Kalaallit Nunaanni eqqartuussisarneq pillugu inatsimmi kapitali 5, § 9 atorineqassaaq, taamaattorli apeqqut Nunatta Eqqartuussivianut suliassanngortillugu.

**§ 21.** Inatsimmik inatsilluunniit malillugu malittarisassiarineqarsimasunik unioqqutitsineq, politiinit taamatullu angallatip aalisarnermik nakkutilliissutip pineqartup naalagaanit aalajangiiffigineqarsinnaavoq akiliisitsinernik, arsaarinninnermik suliamullu tunngasumik aningaasar-tuutit akiligassanngortinnerisigut. Taamatutaaq Kalaallit Nunaanni eqqartuussisarneq pillugu inatsimmi kap. 5, § 21 atorineqassaaq.

*Imm. 2.* Imm. 1 malillugu suliaq aalajangiivigineqanngippat, taanna kredsrettimut suliassanngortinneqassaaq.

*Imm. 3.* Suliap imm. 1 malillugu aalajangiivigineqarsimanera apeqqutaatinnagu Nunatta Eqqartuussiviata piunasaqaateqartoqareerneratigut akuerisinnaavaa, suliap najukkami eqqartuussivimmut suliassanngortinneqarnissaa. Tamannali aatsaat pisinnaavoq pissutsit immikkut ittut tamanna pissutissaqartippassuk, aalajangiisoqareerneratalu kingornatigut piaarnerpaamik piunasaqaat saqqummiunneqarsimappat imaluunniit piunasaqaateqartoq pissutsinik ilisimasaqalersimappat taakkunatigut piunasaqaatiminut tapersiisimasunik.

*Atuutilersitsinermut ikaarsaariarnermullu aalajangersakkat.*

**§ 22.** Inatsit ulloq 1. november 1999 atulerpoq.

*Imm. 2.* Tamatumunnga peqatigitillugu atorunnaarsinneqarpoq Piniarneq aallaaniarnerlu pillugit inatsisartut inatsisaat nr. 15, 6. november 1997-meersoq.

*Imm. 3.* Piniarneq aallaaniarnerlu pillugit inatsisartut inatsisaat nr. 15, 6. november 1997-imeersoq siusinnerusukkulluunniit piniarneq aallaaniarnerlu pillugit malittarisassat malillugit maleruaqqusaliasimasut attatiinnarneqassapput, inatsisartut inatsisaat manna inatsisartulluunniit inatsisaat allat malillugit aalajangersakkatigut atorunnaarsinneqarnissamik tungaanut.

*Namminersornerullutik Oqartussat, ulloq 29. Oktober 1999.*

Jonathan Motzfeldt

/

Simon Olsen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut